

12 OCT 1996

Umno-Mula

PERHIMPUNAN AGUNG UMNO MASUK HARI TERAKHIR

KUALA LUMPUR, 12 Okt (Bernama) -- Perhimpunan Agung Umno yang berlangsung di Pusat Dagangan Dunia Putra di sini masuk hari terakhir hari ini dan dimulakan dengan pembentangan usul agama.

Usul itu dibentang wakil Terengganu Mustapha Muda dan disokong wakil Kedah, Saifudin Nasution Ismail.

Semalam, para perwakilan membahas dan meluluskan usul capan terima kasih ke atas ucapan dasar Presiden parti Datuk Seri Dr Mahathir Mohamad sewaktu merasmikan perhimpunan itu dan usul pendidikan.

Usul pendidikan dibentangkan Wakil Pergerakan Pemuda Umno Mohamed Khaled Nordin dan disokong wakil Umno Sabah Azizi Mohd Nor.

Sebanyak lapan perwakilan masing-masing dari Pergerakan Wanita, Johor, Melaka, Negeri Sembilan, Wilayah Persekutuan, Perlis, Pulau Pinang dan Terengganu telah membahaskan usul itu.

Perhimpunan agung Umno bermula Khamis lalu dengan persidangan Pemuda dan Wanita serta pemilihan untuk mengisi jawatan-jawatan utama parti.

Ketika memulakan aturcara hari ini, Pengerusi Tetap parti Tan Sri Sulaiman Ninam Shah mengumumkan bilangan keanggotaan Umno di negeri-negeri.

Sabah mempunyai anggota terbanyak dengan 355,126 orang diikuti Johor (350,893), Selangor (288,197), Perak (234,220), Kedah (219,156), Kelantan (198,836), Pahang (175,015), Terengganu (146,796), Pulau Pinang (112,318), Negeri Sembilan (108,904), Wilayah Persekutuan (97,949), Melaka (81,070) dan Perlis (42,273).

Silam di Sabah ialah antara bahagian yang mempunyai anggota terbanyak dengan 34,232 orang diikuti Gombak (28,295), Beaufort (28,197), Libaran (27,586), Semporna (27,287) dan Sri Gading (26,337). -- BERNAMA

MAM MOK